

Listovi...

Listovi gračaničkog kalendara od 1. 5. 2002. do 31. 10. 2002. godine

PAGES OF GRACANICA'S CALENDAR

8. 5. 2002.

ZAVRŠENA DRUGA FAZA REGULACIJE SOKOLUŠE

Tehničkim prijemom završena je druga faza regulacije Sokoluše pored Srednjoškolskog centra do glavnog mosta kod "Žitokombinata" u dužini od 250 metara. Uloženo je oko 3600 hiljada KM koje su obezbijeđene iz Opštinskog budžeta i Fonda za vodoprivredu TK i Fonda Sava. Pored otklanjanja mogućnosti poplava, zahvaljujući prirodnim materijalima, posebno kamenim zidovima, obezbijeđen je ljepši estetski izgled i ukupan ambijent u tom dijelu grada.

11. 5. 2002.

NAKON 13 GODINA – PRVA PREMIJERA DRAMSKIH AMATERA GRAČANICE

Riječ je o poznatoj komediji Ive Brešana "Hamlet iz Mrduše Donje" koju je režirao mladi glumac Miralem Džaferović, čiji je rahmetili otac Hasib nekada bio prvak amaterske drame Gračanice. Iako je ova komedija "prezahtjevna" za amaterske dramske ansamble, gračanička pozorišna družina, koja djeluje u okviru KUD-a "Adem Alić", osvjetlala je obraz i oduševila domaću publiku.

16. 5. 2002.

GRAČANIČKI GLASNIK: TRINAESTKA PROMOVISANA U TUZLI

Promociju je organizovala Narodna i univerzitetska biblioteka u Tuzli. Govorili su prof. dr. Ivan Balta, član Mađarske ak-

Omer Hamzić
Listovi gračaničkog kalendara od 1.5.2002.
do 31.10.2002. godine

ademije nauka, prof. Pedagoškog fakulteta u Osijeku i književnici Atif Kujundžić i Zlatko Dukić.

21. 5. 2002.

PETI FESTIVAL DRAMSKOG STVARALAŠTVA MLADIH U GRAČANICI

Punih sedam dana (od 15. do 21. maja) Gračanica je bila grad teatra mladih iz više BiH gradova, među kojima iz Mostara, Ugljevika, Tuzle... Riječ je o Petom festivalu dječijeg dramskog stvaralaštva Bosne i Hercegovine, na kojem su se pojavili dramski stvaraoci iz osnovnih škola "Drežnica" Mostar, "Meša Selimović" Sarajevo, "Ugljevik" Ugljevik, "Brijesnica" Doboj Istok, gračaničke osnovne škole "Hasan Kikić", "Lukavica" i "Soko", te "Sartr" – škola lutkarstva iz Sarajeva, Gradsko pozorište iz Živinica, Društveni omladinski centar "Bijelo polje" Mostar, Dječji studio glume "Roda" Banja Luka, Pozorište mladih "Gimnazijalac" Ljubinje, Teatar Soli Tuzla, Mostarski teatar mladih Mostar i "Forum" teatar Srpsko Sarajevo. Organizatori Festivala su: Dječji dramski studio iz Mostara i Bosanski kulturni centar Gračanica. Za najuspješniju proglašena je predstava "Djeco, znate li šta je na kraju", koju je izveo Dječju studiju "Roda" iz Banja Luke.

Sudeći po interesovanju koje je vladalo za ovu đачku smotru, Gračanica pouzdano može računati na svoju mladu pozorišnu publiku.

24. 5. 2002.

OKRUGLI STO: "PISANI MEDIJI U GRAČANICI TOKOM RATA 1992.– 1995. GODINA"

Okrugli sto je organizovan u povodu 25. maja, Dana odbrane Gračanice, odnosno desete godišnjice od izbijanja agresije na ovim prostorima. U radu skupa uzeli su učešća članovi redakcije i saradnici gračaničkog ratnog lista "Biljeg vreme-

na" i "Informativni bilten", istaknuti ratni komandanti i ratni rukovodioci opštine Gračanica. Glavni uvodničar i medijator bio je književnik Atif Kujundžić, koji je zapaženu studiju na tu temu objavio u posljednjem, 13. broju "Gračaničkog glasnika". Reprint izdanje pomenutih ratnih glasila prisutnima je prezentirala gračanička izdavačka kuća "Monos".

29. 5. 2002. godine

DVADESET TREĆA SJEDNICA OPĆINSKOG VIJEĆA:

ODLUKA O OPĆINSKIM PRIZNANJIMA I IZVJEŠTAJI IZ OBLASTI PRAVOSUĐA

Pored Odluke o općinskim priznanjima koja se dodjeljuje povodom Dana općine, vijećnici su razmatrali i usvojili Izvještaj o radu Općinskog pravobranilaštva za 2001. godinu, te informacije o radu Općinskog suda i Općinskog suda za prekršaje za 2001. godinu. Općinskom tužilaštvu upućene su ozbiljne primjedbe zato što u skladu sa Zakonom nije ispoljilo više inicijative u slučajevima takozvane treće faze Doma kulture u Gračanici i kupovine zgrade u kojoj se nalazi poslovni prostor SDA u Gračanici.

30.5.2002.

GRAČANIČKI GLASNIK: PROMOVISANA TRINAESTKA I U GRAČANICI

Svoje radove iz ovog broja gračaničkoj publici predstavili su prof. dr. Salih Jali-mam i prof. dr. Ivan Balta. Riječ je o historiografsko-paleografskoj analizi jedne latinske srednjovjekovne isprave, kao najstarijem do sada poznatom dokumentu u kojem se spominje srednjovjekovni grad Sokol kod Gračanice. Prisutni su posebno zanimanje ispoljili za srednjovjekovnu historiografiju i heraldiku, o čemu su opširnije govorili profesori Balta i Jali-mam.

2. 6. 2002.

SVEČANO OBILJEŽEN 2. JUN, DAN OPĆINE GRAČANICA

Nizom kulturnih i sportskih manifestacija, u periodu od 15. maja do 2. juna, obilježeni su "Dani Gračanice", Dan odbrane, 25. maj, i Dan općine, 2. jun. Izdajamo "Miris gračaničkih lipa", Četvrte brdske autotrke "Gračanica 2002.", više kvalitetnih fudbalskih mečeva, cjelovečernjih kulturnih programa itd.

U sklopu proslave, simbolično je označen početak radova na dogradnji objekata Opće bolnice "Dr. Mustafa Beganović" u Gračanici.

Na svečanoj akademiji, povodom Dana općine, dodijeljena su tradicionalna općinska priznanja, pohvale i nagrade. Zlatna plaketa općine Gračanica dodijeljena je firmama "Fortuna" i "Variplast", Srebrene plaketa dodijeljena je Mjesnoj zajednici Prijeko Brdo i firmama "Modaplast" i "Olimp", Zlatne značke općine Gračanica dobili su Osman Basić iz Donje Orahovice, dr. Edvin Mulalić iz Gračanice i dr. Zijad Terzić iz Gračanice, Srebrene značke dobili su Zijad Isić iz Rašljeve, Milosav Mikić iz Gračanice, Jusuf Kadić iz Gračanice, Asim Džananović iz Doborovaca i Jusuf Omerčičević iz Babića. Priznanje "Počasni građanin općine Gračanica" dodijeljeno je gđi Miloški Nott, poznatoj humanitarki iz Londona, koja se posebno angažovala na opremanju nekoliko osnovnih škola u Gračanici.

15. 6. 2002.

GRAČANIČKO PERADARSTVO: KAMEN TEMELJAC ZA NOVI PROIZVODNI KOMPLEKS U PRIBAVI

Riječ je velikoj farmi, površine 4.693 kvadratnih metara i pratećim prerađivačkim kapacitetima, u kojima će

posao naći oko 600 radnika. Projekt vrijedan oko 50 miliona KM finansirat će se iz Federalnog fonda za zapošljavanje, iz komercijalnih kredita i odgovarajućih izvora međunarodne zajednice.

To je veliki poticaj za dalji razvoj peradarske proizvodnje na području Gračanice, koja pilećim mesom snabdijeva kompletno tržište Bosne i Hercegovine.

28. 6. 2002.

DVADESET ČETVRTA SJEDNICA OPĆINSKOG VIJEĆA GRAČANICA: IZVJEŠTAJ O POJAVI ANTRAKSA U NASELJU LUKAVICA I OSTVARENJE OPĆINSKOG BUDŽETA

Na sjednici je rečeno da je prvo, 14. 6. 2002. godine, u mahali Delići, u selu Lukavica od posljedica antraksa uginula krava, a sedam dana kasnije umrlo je lice koje je ogulilo kožu sa tog uginulog grla. Vijećnici su informisani o svim mjerama zaštite i sprečavanja daljeg širenja te bolesti, koje već daju odgovarajuće efekte.

Ostvareni prihodi Općinskog budžeta veći su za 76% u odnosu na isti period prethodne godine, ali se Budžet ne ostvaruje planiranom dinamikom, pa su i predložene dodatne mjere za njegovo punjenje.

Vijeće je usvojilo i informacije: o sigurnosnoj situaciji na općini, o stepenu sanacije klizišta, o korištenju i upravljanju općinskim zemljištem, o stanju ratom stradalog stambenog fonda itd.

10. 7. 2002.

PRORADILE GRAČANIČKE "TERME"

Bio je to veliki projekat, koji se zasnivao na velikim količinama termomineralnih i ljekovitih voda s obje strane Spreče, kao idealnom prirodnom resursu za razvoj zdravstveno-rekreativnog turizma, poljo-

privrede, eksploatacije plina CO₂ i toplifikaciju industrijskih pogona i stambenih objekata. Projekti su se zasnivali na rezultatima, istraživanjima i vizijama čuvenog stručnjaka iz oblasti balneologije, akademika Jospa Baća, koji je Gračanicu zadužio i za otkriće izvorišta pitke vode, odakle se Gračanica i danas "napaja". Prvi bazeni proradili su na području Kakmuža, sada već daleke 1985. godine. U isto vrijeme počela je i eksploatacija plina CO₂ i definisani projekti toplifikacije Gračаницe, te projekti ostalih sadržaja koji su se trebali razvijati s desne strane Spreče.

Nažalost, rat je zaustavio realizaciju ovog velikog projekta. Nakon Dejtona, izgrađeni objekti u Kakmužu ostali su u "drugom" entitetu.

Ove godine, ipak, nakon višegodišnjih priprema, stekli su se uslovi za nastavak, odnosno realizaciju tog projekta s desne strane Spreče. Na lokaciji Šenik, u prekrasnom prirodnom ambijentu, koji je urbanističkim planom zaštićen od dalje nekontrolisane gradnje, gračanička uspješno privatizovana firma "Terme", počela je izgradnju budućeg Zdravstveno-rekreacionog centra. Projekat se zasniva na dokazanoj izdašnosti izvorišta termomineralne vode, čija je temperatura 35 stepeni celzijevih. Izgrađen je bazen 25x15 metara, a odmah pored bazena objekat sa svim pratećim sadržajima, te kade koje, uz ljekarski nadzor, već koriste pacijenti iz Gračаницe i susjednih mjesta. Ljekovitost ovih voda odavno je dokazana, posebno za liječenje reumatizma, kožnih oboljenja i postoperativni tretman. Osim liječenja, na gračaničkim termama, mnoge Gračanlije, kao i posjetioци iz drugih mjesta ovog ljeta provode priyatne trenutke odmora i osvježenja.

18. 7. 2002.

DVADESET PETA SJEDNICA OPĆINSKOG VIJEĆA

GRAČANICA: INICIJATIVA ZA IZMJENU GRBA OPĆINE GRAČANICA...

...pokrenuta je iz više razloga: ustanovljen je stariji pomen Gračаницe u historijskim izvorima u odnosu na godinu 1528., koja je ispisana na sadašnjem grbu. To je 2. jun 1429. godine, koji se obilježava i kao Dan općine, što će se, uz izmjenu još nekih detalja, imati u vidu prilikom redizajniranja sadašnjeg grba općine.

Usvojena je i Informacija o pripremanju za održavanje izbora 5. 10. 2002. godine, Izvještaj o zdravstvenom stanju stanovništva na području općine Gračаницa, te neke informacije iz oblasti komunalija i saobraćaja.

2. 8. 2002.

PRORADILI BAZENI ZA KUPANJE "NASKO" U DONJOJ ORAHOVICI

Radi se o olimpijskom bazenu 50x21 metar i bazenu za djecu 8x8 metara, te neophodnim pratećim objektima, koji predstavljaju samo prvu fazu budućeg sportsko-rekreacionog centra privatnog poduzetnika iz Orahovice, Nasmera Karića. Centar se razvija na površini od 4 hektara izvanrednog prirodnog ambijenta, a udaljen je svega 200 metara od magistralnog puta Doboj-Tuzla.

20. 8. 2002.

IZVRŠENA KONZERVACIJA GRAČANIČKOG "ĆIRE"

Uskotračnom prugom do Karanovca Gračаницa je "izašla" na željeznicu moćne Austrougarske imperije 1898. godine. Popularni "Ćiro" bio je u službi sve do 1968. godine, kada je morao otići u staro gvožđe, zajedno sa ostalim uskotračnim prugama u Bosni i Hercegovini. Os-

tao je u nostalgичnom sjećanju mnogih starijih Gračanlija, posebno po atraktivnom mostu iznad tadašnje željezničke stanice (sadašnja Autobuska stanica), koji je povezivao Čaršiju sa naseljem Čiriš. Od tog starog "Ćire" na autobuskoj stanici do današnjeg dana ostala je samo zahrđala lokomotiva, koja je bila više ruglo neko atrakcija grada. Srećom, na inicijativu

građana i na zahtjev gračaničkog udruženja za zaštitu kulturno-historijskih spomenika "Soko", opštinske vlasti su pronašle adekvatnu lokaciju i izvršile potpunu konzervaciju lokomotive, koja je "bljesnula" u svom punom sjaju i postala jedno od zanimljivih obilježja gračaničke čaršije. Neka to bude simboličan početak ozbiljnije zaštite spomeničke i kulturne baštine na ovom prostoru.

20. 8. 2002.

DONJA ORAHOVICA: "CIJELO SELO POD ASFALTOM"

To je naslov priloga iz "Dnevnog avaza", u kojem dopisnik tog lista iz Gračanice, Hasan Čalić, izvještava da je Donja Orahovica prva mjesna zajednica na području općine Gračanica u kojoj su svi lokalni putevi asfaltirani. U mahalama Rijeka – Karići i Kamenica – Bajići asfaltirano je 5.239 dužnih metara lokalnih puteva. Uloženo je oko pola miliona maraka koje su obezbijedili mještani, Vlada Tuzlanskog kantona, općina Gračanica i mjesna zajednica Donja Orahovica.



Slika 1. Obnovljeni gračanički "Ćiro" (Foto-Nikon)

25. 8. 2002.

GRAPSKA — DESET GODINA POSLIJE


Grapska je jedno od prvih i najteže post-radalih bošnjačkih sela u minulom ratu na širem prostoru između Gračanice i Doboja. Ovdje će se vječno pamtiti deseti maj 1992. godine kada su srpske snage iz Doboja porušile i spalile 878 kuća, odvele u logore 390 muškaraca, na licu mjesta pobile 32 osobe, ostalo stanovništvo protjerale prema Gračanici...

Deset godina kasnije, ovo moćno selo pored rijeke Bosne diže se, takoreći, iz pepela. Obnovljeno je ili nanovo sagrađeno više od polovine stambenih i gospodarskih objekata, obnovljena je osnovna škola, koju će pohađati više od 100 đaka, izgrađen novi vodovod, podignuta džamija, vratilo se iz izbjeglištva 1200 mještana. Dopisnik "Dnevnog avaza", Hasan Čalić, ističe Grapsku kao primjer uspješnog povratka, suživota i kompromisa.

1. 9. 2002.

NOVA DŽAMIJA U GRAPSKOJ

U prisustvu više od 20.000 vjernika iz cijele Bosne i Hercegovine otvorena je novosagrađena džamija, sa mun-



arom visokom 38 metara i dvije šerefte, kao jednim od simbola uspješnog povratka Bošnjaka u to postradalo selo pored Bosne. U izgradnju džamije džematlije Grapske uložile su 220 hiljada KM.

27. 9. 2002.

**DVADESET ŠESTA SJEDNICA OPĆINSKOG VIJEĆA
GRAČANICA: DOPUNA ODLUKE O STIPENDIRANJA
ĐAKA I STUDENATA, DOPUNA ODLUKE O
GRAČANIČKOM VAŠARU, MALOLJETNIČKA
DELIKVENCIJA I UPOTREBA NARKOTIKA NA OPŠTINI**

Utvrđeno je da se studentima prve godine dodijeli 5, a ostalim ukupno 15 stipendija, sa mjesečnim iznosom od 100 KM. Za stipendiranje učenika srednjih škola utvrđeno je ukupno 20 stipendija (za svaki razred po pet). Visina mjesečne stipendije za srednjoškolce je 50 KM.

Informacija o maloljetničkoj delikvenciji i narkomaniji na općini privukla je posebnu pažnju i izazvala zabrinutost vijećnika, koji su podržali mjere policije, ali i ostalih društvenih faktora na suzbijanju tog velikog zla koje je u porastu i na

području općine Gračanica. Informacija o privrednim kretanjima na općini za prvih 6 mjeseci ove godine prihvaćena je bez rasprave.

3. 10. 2002.

**PREDAT NA UPOTREBU NOVOSAGRAĐENI
HIRURŠKI ODJEL OPŠTE BOLNICE "DR. MUSTAFA
BEGANOVIĆ" U GRAČANICI**

Dogradnja odjela u okviru Bolnice trajala je nepunih 5 mjeseci. Odjel je opremljen savremenim uređajima, koji u ovoj Bolnici obezbjeđuju izvođenje i složenijih hirurških zahvata. Kapaciteti su namijenjeni žiteljima gračaničke i susjednih opština. Gradnju i opremanje finansirali su: Kantonalni zavod zdravstvenog osiguranja, Opšta bolnica i opština Gračanica.

Sa ovako koncipiranim i opremljenim medicinskim kapacitetima, dobrom kadrovskom strukturom, uspješno organiziranom primarnom zdravstvenom zaštitom u Domu zdravlja Gračanica i polikliničko-dijagnostičkim službama Opšte bolnice, po svojoj razvijenosti gračaničko zdravstvo zauzima drugo mjesto na Tuzlanskom kantonu, odmah iza Tuzle. To je još jedan od velikih uspjeha Gračanice.

5. 10. 2002.

IZBORI SE...

Pod tim sloganom, nakon žestoke, i po mnogima, do sada najprljavije kampanje, odigrali su se četvrti poslijeratni i prvi izbori u organizaciji domaćih vlasti u Bosni i Hercegovini. Na 4.106 biračkih mjesta Bosanci i Hercegovci, na mandat od četiri godine birali su članove Predsjedništva BiH, predsjednika i dva potpredsjednika Republike Srpske, zatim predstavnike u Zastupničkom domu Parlamentarne skupštine BiH i Zastupničkom domu

Parlamenta Federacije BiH, poslanike u Skupštini Republike Srpske, poslanike u kantonalnim skupštinama i zastupnike Općinskog vijeća Žepče.

U centralnim biračkim spiskovima upisano je 2,343.075 građana BiH sa pravom glasa, koji su imali na raspolaganju "ponudu" od 57 stranaka, devet koalicija i tri neovisna kandidata. Na stranačkim listama "ponuđeno" je 7.537 kandidata.

Na opštini Gračanica upisano je 28.137 birača, koji su glasali na 39 biračkih mjesta.

Prema ocjeni gosp. Ahmeda Hamidovića, predsjednika Lokalne izborne komisije, izbori na području gračaničke opštine obavljani su u najboljem redu i bez nekih posebnih problema. protekli bez ikakvih problema i incidenata.

19. 10. 2002.

OBJAVLJENI KONAČNI REZULTATI OVOGODIŠNJIH OPŠTIH IZBORA: NAJVIŠE GLASOVA DOBILE SDA, SDS I HDZ

Glavne karakteristike ovih izbora su: velika apstinencija biračkog tijela (glasalo jedva nešto preko 50%), težak poraz SDP, pobjednički povratak nacionalnih stranaka na političku scenu BIH i poraz Harisa

Silajdžića, kandidata Stranke za BiH u "mrtvoj trci" sa Sulejmanom Tihićem, kandidatom SDA za mjesto bošnjačkog člana Predsjedništva BiH.

Od svih stranaka koje su se natjecale za naklonost birača, SDA je dobila ubjedljivo najviše glasova i na području gračaničke opštine, i to na sva četiri nivoa glasanja, potom slijedi SDP, Stranka za BiH itd. I dok SDA "pravi halvaluk", u SDP se međusobno optužuju za poraz i prokockano povjerenje birača, koji više nikom ne praštaju.

31. 10. 2002.

DVADESET SEDMA SJEDNICA OPĆINSKOG VIJEĆA GRAČANICA: STATUT OPĆINE USKLAĐEN SA ZAKONOM O LOKALNOJ SAMOUPRAVI, IZBORI 5. OKTOBRA, 2002. GODINE PROŠLI U NAJBOLJEM REDU.

To je konstatovano u Informaciji Lokalne izborne komisije koju su Vijećnici primili k znanju. Usvojili su i Odluku o provođenju urbanističkog projekta "Tržnica i pijaca" u Gračanici te informaciju o izvršenju Budžeta općine za period januar – septembar 2002. godine. U ovom periodu prihodi su ostvareni u iznosu od 3.236.700 KM ili 89,91%, a rashodi u iznosu od 3.182.393 KM ili 82,91% u odnosu na plan.

Napomena Redakcije

- U broju 13 "Gračaničkog glasnika" na Spisku civilnih žrtava rata (1992.-1995.) sa područja općine Gračanica, na strani 60, izostavljena su slijedeća imena: Junuzović (Rašida) Bahrija, Purač (Edhema) Dževad, Mujačić (Hajrije) Hamdija i Imamović Ismet, svi iz Gračanice, koji su život izgubili u granatiranjima 1993. godine. Zahvaljujemo se gospodinu Salihu Širbegoviću iz Gračanice, koji nam je ukazao na ovaj propust, do kojeg nije došlo krivicom Redakcije već nekih drugih faktora.